



Qasigiannugit Aasiaallu akornanni erngup nukinganik nukissiorfiliornissamut misissuineranut atatillugu nunaqarfiit qanigisaaniittut erngup nukinganik nukissiuutillu ataavartut allat atorlugit nukissiorfilernissaannik periarfissat misissoqullugit peqquneqarnissaannik siunnersuut. Misissuinermi Igalikumi nukissiuutininik ataavartunik assigiinngitsunik atuinermik misileraanermit maanna ingerlasumit misilittakkat ilanngunneqassapput misissuinerullu inerner kingusinnerpaamik UKA2017-mi Inatsisartunut saqqummiunneqassalluni.

(Inatsisartunut ilaasortaq Ane Hansen, Inuit Ataqatigiit)

Nunaqarfiit illoqarfiillu peqatigiilluta siuarsagassavut ineriartutsaalineqassanngillat. Siuarsartuartaqarpagut. Oqartarput nunaqarfiit ilai ineriartornissamut periarfissaqanngitsut. Taamak oqaluttut namminneq atukkamikkut siuarsaajuarpugut, oqaluttuunniarpaatigullu nunaqarfiit ilai matuinnassagigut akissaqarfiginnginnatsiginngooq. Taamaattoqanngilaq. Siuarsaqatigiinniarta ataatsimut suleqatigiilluta. Ane Hansen Inuit Ataqatigiinniit siunnersuuteqartoq isumaqatigaarput.

Aasianni Qasigiannuguanilu erngup nukinganik innaallagissiorfiliorsinnaanermut periarfissanik aningaasalersueriaasissamik periusissioqattaaginnarnanilu pisaarnissaa tassa piffissanngorpoq. Qangali piffissaareerpoq aalajangiinnarsimasinnaagaluarpuq. Tunngavissagut naammajuussualereerput, saninnguatsinni kuuit kuunnartut nukissiorfigiumagutsigit atortariaqarpagut. Nunatta avataaniit akilersinnaanngitsumik siursaataanngitsumillu akit aqussinnaanngisagut, ukiulli ilaanni inuuniarnikkut akit tatisuurtut annaffissatuatut isigiunnaartariaqarpagut.

Akilersinnaaneruvoq erngup nukissiorfiliorniarta. Nunatsinni inuit akinik qaffasissunik atugaqarunnaarnissaat anguneqassappat naalakkersuinnikkut nukik pilersittariaqarpoq. Tassalu politikkerit akornatsinni suleqatigiinneq annertusarlugu. Siuarsarumasavut isigalugit, ilaatillugit, sullillugit atugarissaalersikkumallugillu sakkortusisamik timitalersuisariaqarpagut.

Qularnanngilaq tappika allaffissuarmi misissuimatuut nalunaarusiarsuarnillu nuannarisaqartut oqassagaluarput,- soorunami misissuilluaqqaartariaqartugut, naggataatigullu erngup nukissiorfeqalernissarput imminut akilersinnaanngitsoq killissagaat. Taava politikkerit tamatta isumaqalertuaannarsinnaanngilagut suliassaq akilersinnaanngimmat piaarnerpaamik unitsinneqartariaqartoq. Naamik, akilersinnaanerpaajuvoq nunatsinni inuit atugaat oqilisarutsigit. Nunatsinniit aningaasat annissornagit nunatsinniitiinnarutsigit. Nunaqarfiit illoqarfiit inuuffigiuminarsitikkutsigit inuuniarneq nunatsinni oqilisaatissavarput.

Inuit Ataqatigiit assut isumaqatigisatsinnik Inatsisartunut ilaasortaq Ane Hansen siunnersuuteqarpoq. Aamma Inatsisartunut ilaasortaq Kalistat Lund upernaq siunnersuuteqarpoq Alluitsup Paa erngup nukinganik innaallagissiorfimmut

INUIT ATAQATIGIIT

INATSISARTUNI



attavilerneqassasoq. Inuit Ataqatigiit nunaqarfinnut illoqarfinnut inoqarfippassuarnullu siuarsaanissaq aningaasalersuinissarlu anguniarparput; sooq? Upperigatsigu siunissaq periarfissarpassuarnik ammaassisoq ornillutigu. Isumaqaqnginnatta nunaqarfinni inuit sipaarniarfissaannaasut akissaqarfigisariaqaqngitsullu.

Taamaangilaq. Nunaqarfiit illoqarfiillu nunatsinni siammaasissumik inissisimasut inuiaqatigiit kalaallit nunaminni nakkutiginninnerannut takussutissaapput. Uparuarneqarsinnaangilanga isumaqaruma nunaqarfiit ilaat illoqarfissuarnut sanilliullugit agguaqatigiissikkaanni allaat nunatsinni aningaasamik pilersitsisarnerat annerusartoq. Nunaqarfittaqaqarnerput atorluartigu, illoqarfiillu periarfissallit atorluartigit. Tamarmik periarfissarpassuaqarput. Suli ilinniartitaaneq tamatigoornerusoq pisuussutinillu atorluanerulernissamik tunisassiassanik pinngorartitsisoq pisariaqartippaaput. Piffissaangilaq ingilluni oqaannassalluni; "nunaqarfiit akilersinnaangillat".

Aningaasat nunatsinni ineriartornitsinni sunniuteqaqarnerullutik pilersitseqataassappata, taava, nunatta avataanut aningaasanik aniatitsiuarnerput sakkortuumik sukateriffigisariaqarparput. Aningaasarsiorfiit nutaat, Suliffissat nutaat, aamma nutaanik pinngorartitsinissamut misileraanerit tamarmik ataatsimoorutigisaat tassaavoq, - akilersinnaassutsimik akinillu appasissunik aamma innaallagissap akiinik appasissunik pisariaqartitsigamik.

Inuit Ataqatigiit ilanngullugu tikkuarniarparput ingerlatseqatigiiffiit inuiaqatigiit piginneqataaffigisaat, soorlu Nukissiorfiit allallu ingerlatseqatigiiffiit eqqarsaatigalugit naalakkersuinikkut piunasaqarfiginerulertariaqarpagut. Nunarput inuiaqatigiillu nunatsinniittut misigissuseqarfigalugit aqutsinnaassuseqartut katersortariaqarpagut. Nunarput aamma nunatta inui sullittariaqalerpagut. Aqutsilluarsimanermut uppersaat pappiaqqamiinnaq pinnani aamma inuit atugaasigut takussaasunngortariaqalerpoq.

Inoqarfiit siuarsarniarlik. Siuarsaaneq naalakkersuinikkut katersuuffiuniarli. Ineriartorneq akisussaaffigisarput politikkeriniippoq. Akisussaassuseqarluta suleqatigiilluta aallartinniarta inuit periarfissillugit. Taamaammat siunnersuut una Inatsisartut ataatsimiititaliaani suliarineqassasoq inassutigaaqarput. Neriulluta partiit tamarmik taperserlugu suleqataaffigissagaat.